

n Nij laid mit n Grunneger gobbel: hou zol dat vuilen?



▲ ...k zai Groot Maark, Olle Grieze, zo is der mor ain...

■ **DELFIJEL** – As ie aankom vrijdag of zotterdag (n koppeltje laifhebbers zit der zölfs baaide oavends) mitzingen willen bie t Mollebone-festival: hier binnen woorden van t nije Grunneger laid van Fré Schreiber en Kees Steketee. Tekst zel doar wel oetdaild worden, mor leesders van dizze kraande kinnen zok der nou al op veurberaaiden.

Woorden van 'Grunnegers' binnen nait stoer. Allinneg, as ie joe in dat laid gooien willen: der zit in ainen n hoge noot in, woar ie wizze op verdocht wizen mouten. Nait elkenain zel hom vot berekken kinnen, mor

ie maggen best n oktoaf leger goan. As ie mor mitdoun: zingen, nuuntjen of brommen, moakt nait oet.

t Begunt zo: *Ik zing mien laid opt Hogelaand, doar schoam ik mie nait veur. k Zai kwelderblomkes, klaaigrond, kerken, wat n kleur en fleur. Nou wodt mie t aal wat wee om t haart en dink: dat is nait min. k Mag mie gelokkeg priesen, dat k n Grunneger bin. Ik zing mien laid maank stroekerij, dit is t Westerketaaier. k Zai maimesienen, meren, meulens, t is ja singelaaiier. Nou wodt mie t aal...* Ie waiten al hou.

t Refraain: *Grunnegers, o*

Grunnegers, hol joen laid in eren. Joen moudertoal, dij mag je nooit verleren. Zing t mor oet, bie bliedschop, bie verdrait. Ons Grunneger laid zel bestoan veur aaid.

Nij keplet: *t Oldambt is streek doar ik van zing, beslist ook muite weerd. k Zai boerenploatsen, baisten, boten, hail gemoudereerd. Nou wodt mie t aal... Krekt as boven. Ik zing mien laid in Westerwol, schoon wotter bie de vleet. k Zai sukerbaiten, schappen, sluzen, rust is hier compleet. Nou wodt miet aal... Weer krekt zo en nou t refraain. Wieder: Mor Stad is Stad en zo is dat, t liekt zo aal-*

gemain. k Zai Nijstad, Grootmaark, Olle Grieze, zo is der mor ain. Nu wodt miet aal... En omdat t zo schier gaait, twijmoal t refraain.

Ik stel veur, dat der ieder moal as der n nije regel van n keplet begunt vief riegen peblik opstoan en vot weer zitten goan. Den krieg wie in De Meulenbaarg (krecht as op tribunes bie t voetballen) noar t zingen van t refraain tou n *Mexican wave*, n *Delfzijler deining*, n *Grunneger gobbel*. En den bie t refraain baaide handen boven kop hinneweer swaaien, zuzooien of (veur Oldambtsters) zoiboien. t Laid is

der gewoon veur moakt.

Der bie in d holden stoan huift nait, zo laank wie *Van Lauwerszee tot Dollard tou* nog as Grunneger Laid nummer ain in eren hollen. k Mout zeggen, dat k woorden as *hoelt, soest, broest, waarkt en wuilt, richt en slicht, de dege degelk-haid* ook nait geern mizzen wol. As dij begeistert zongen worden, kin ie aan dat *oe, oe, oe*, dat *waarkt en wuilt* ja heuren, dat ze van binnenoet komen. k Bin benijd hou dat bie *Grunnegers* goan en vuilen zel.